

# Statuts

UNIUN GRISCHUNA D'ART

## **I. NUM, SEDIA ED INTENT**

### Art. 1 Num, sedia

1.1 Sut il num «Uniun grischuna d'art» exista in'uniun en il senn da l'art. 60 ss. CCS cun sedia a Cuira. L'uniun è vegnida fundada l'onn 1900.

1.2 Ella è ina secziun da la Societad svizra d'art.

### Art. 2 Intent

2.1 L'Uniun grischuna d'art ha l'intent da svegliar e da promover en il Chantun l'interess per l'art figurativ en sia diversitad mediala.

2.2 En il rom dal contract concludì cun il chantun Grischun sco proprietari dal Museum d'art dal Grischun a Cuira organisescha l'Uniun grischuna d'art exposiziuns d'ovras da l'art figurativ.

## **II. COMMEMBRANZA**

### Art. 3 Commembers

Commembers da l'uniun pon daventar persunas natiralas e giuridicas.

### Art. 4 Categorias da commembers

Igl existan las suandantas categorias da commembers:

- commembers singuls (persunas natiralas e giuridicas)
- pèrs
- artistas ed artists
- giuvenils e giuvens creschids en scolaziun fin il 26avel onn da vegliadetgna accumulì
- fauturs: persunas privatas
- fauturs: firmas
- fauturs: vischnancas
- commembers d'onur

### Art. 5 Commembranza per vita duranta

La commemoranza per vita duranta po vegnir acquistada cun ina contribuziun unica.

**Art. 6 Dretgs**

- 6.1 L'entrada a las exposiziuns ed occurrenzas spezialas organisadas da l'Uniun grischuna d'art è per ils commembers gratuita u reducida.
- 6.2 Sin las publicaziuns ed ediziuns da l'Uniun grischuna d'art survegnan ils commembers in rabat.

**Art. 7 Extrada**

- 7.1 L'extrada da l'uniun succeda cun ina decleraziun en scrit a la suprastanza. La decleraziun è pussaivla da tut temp. Ella è dentant valaivla pir sin la fin da l'onn suandant; fin a quel termin è da pajar era la contribuziun da commember.
- 7.2 Commembers che extreschan n'han nagin dretg a la facultad da l'uniun.

**III. MEDS****Art. 8 En general**

L'Uniun grischuna d'art finanziescha sias activitads cun

- contribuziuns da commember
- contribuziuns dal Chantun
- contribuziuns da la vischnanca da domicil da Cuira
- daners da sponsurs e donaziuns
- daners da las entradas dal museum
- entradas da la butia dal museum
- provisiuns da vendas d'ovras da las exposiziuns

**Art. 9 Contribuziuns da commember en particular**

- 9.1 La contribuziun annuala per las singulas categorias da commembers vegn fixada mintg'onn da la radunanza generala.
- 9.2 Ils commembers d'onur èn liberads da l'obligaziun da pajar contribuziuns.

**Art. 10 Responsabladad**

La responsabladad persunala dals commembers da l'uniun è esclusa. Per las obligaziuns da l'uniun stat buna exclusivamain la facultad da l'uniun.

## IV. ORGANISAZIUN

### Art. 11 Organs

Ils organs da l'uniun èn:

- la radunanza generala
- la suprastanza
- las revisuras ed ils revisurs da quints

### Art. 12 La radunanza generala

12.1 La radunanza generala ordinaria ha lieu ina giada l'onn il pli tard sis mais suenter la fin da l'onn da gestiun.

12.2 L'invit en scrit cun la glista da tractandas è da trametter almain 30 dis avant la radunanza generala.

Propostas dals commembers per mauns da la radunanza generala ston vegnir communitgadas a la suprastanza en scrit almain 14 dis avant la radunanza generala. Propostas che entran pli tard ston vegnir discutadas a la radunanza generala, ma ina decisiun en chausa po vegnir prendida pir a chaschun da la radunanza generala suandanta.

12.3 Radunanzas generalas extraordinarias vegnan convocadas sin decisiun da la suprastanza u sch'in dieschavel dals commembers giavischa quai; ina dumonda correspondentia cun indicaziun dals motivs sto vegnir inoltrada en scrit.

12.4 La radunanza generala vegn manada dal president/da la presidenta, dal vicepresidente/da la vicepresidente u d'ina persuna nominada da la suprastanza. Las tractativas vegnan protocolladas.

12.5 La radunanza generala ha las suandantas cumpetenzas:

- eleger ils 7 fin 11 commembers da suprastanza per la durada da trais onns; il temp d'uffizi dals commembers da suprastanza è limità a totalmain 12 onns;
- eleger entaifer ils commembers da l'uniun dus revisurs/duas revisuras da quints per la durada d'uffizi da trais onns;
- approvar ils rapports da gestiun ed il quint annual e distgargiar la suprastanza;

- fixar las contribuziuns da commember;
- decider davart las propostas dals commembers tenor l'art. 12.2;
- nominar ils commembers d'onur;
- midar ils statuts da l'uniun;
- schliar l'uniun.

12.6 Mintga commember ha ina vusch. Las decisiuns ed elecziuns succedan a moda averta. I vala la maioritad absoluta dals commembers da l'uniun preschents; la vusch dal president/da la presidenta vegn resguardada e decida en cas da paritad da las vuschs. Per decider davart la schliaziun da l'uniun basegni la maioritad da dus terzs dals commembers da l'uniun preschents.

### Art. 13 La suprastanza

13.1 La suprastanza represchenta l'uniun vers anora. Ella s'occupa da tut las fatschentas che n'èn betg resalvadas a la radunanza generala. Ella redigia per mauns da la radunanza generala in rapport da gestiun e preschenta ad ella il quint per controlla ed approvaziun.

Ultra da quai è ella surtut responsabla per

- il program d'exposiziuns proponì dal directur/da la directura dal museum;
- il budget annual;
- il sortiment en la butia dal museum en cunvegientscha cun il directur/la directura dal museum;
- la gestiun dal café dal museum en il rom da la cunvegna tranter il chantun Grischun e l'Uniun grischuna d'art;
- l'elecziun da sia represchentanza en la Fundaziun collecziun d'art dal Grischun; l'elecziun succeda per la durada da trais onns cun ina limitaziun d'uffizi da 12 onns;
- la delegaziun d'in commember a la radunanza da delegadas e delegads da la Societad svizra d'art.

Il directur/la directura dal Museum d'art dal Grischun fa part da la suprastanza sco commember ex officio.

13.2 La suprastanza sa constituescha sezza.

Ella po installar giuntas e cumissiuns per incumbensas particularas e delegar a quellas singulas da sias incumbensas. Las giuntas e cumissiuns vegnan survegliadas da la suprastanza.

13.3 Il president/la presidenta ed in ulteriur commember da la suprastanza u il directur/la directura dal museum han il dretg da sutscriziun collectiva en dus.

13.4 La suprastanza convochescha sut il presidi da ses president/sia presidenta tantas sedutas sco necessari per ademplir las fatschentas.

Per prender ina decisiun basegni la preschientscha da la maioritad dals commembers. La suprastanza decida cun la maioritad simpla dals commembers preschents; en cas da paritad da las vuschs ha il president/la presidenta la vusch da tagl.

Art. 14 Ils revisurs e las revisuras da quints

Ils revisurs e las revisuras da quints controlleschan il quint annual da l'uniun; els dattan rapport e fan ina proposta per mauns da la radunanza generala.

**V. SCHLIAZIUN**

Art. 15 En cas che l'Uniun grischuna d'art vegn schliada, va la facultad a la Fundaziun collecziun d'art dal Grischun.

---

Quests statuts remplazzan ils statuts da l'uniun dals 14 d'avrigl 1980. Els èn vegnids approvads a la radunanza generala dals 10 da zercladur 2015 ed èn entrads en vigur immediat.

Cuira, ils 10 da zercladur 2015

il president  
Dieter Jüngling

la vicepresidente  
Irmgard Camenisch